



SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XIII

BROJ: 210

DATUM: 08.01.2016.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja
fax: + 387 33 552 810
dzenita@sogfbih.ba

Sadržaj biltena:

Vlada Federacije BiH utvrdila Nacrt zakona o premjeru i registraciji nekretnina

1

Općina Žepče ispunila uslove za dodjelu BFC sertifikata

1

Intervju sa načelnikom Bužima Aganom Bunićem

2

Općina Visoko u projektu osposobljavanja i zapošljavanja šivača

4

Kanton Sarajevo predstavio podršku za poslovanje

4

Općina Hadžići kupila zemlju bivše PDI "Bjelašnica"

5

Godina uspješnih projekata sara-jevske Općine Novi Grad

5

Vizija Mostara kao etropolisa i etnopolisa uz podršku građana

6

Bilten Saveza općina i gradova Federacije Bosne i Hercegovine

VLADA FEDERACIJE BIH UTVRDLA NACRT ZAKONA O PREMJERU I REGISTRACIJI NEKRETNINA

Vlada Federacije Bosne i Hercegovine je, na sjednici koja je održana u Mostaru, 23. decembra/prosinca utvrdila Nacrt zakona o premjeru i registraciji nekretnina kojim se regulišu upravni i stručni poslovi koji se odnose na premjer Federacije Bosne i Hercegovine, registraciju nekretnina, osnovne geodetske radove, topografsko-kartografsku djelatnost, registar prostornih jedinica, procjenu vrijednosti nekretnina, katastar vodova, adresni registar,



infrastrukturu prostornih podataka Federacije i geodetski radovi u inženjersko-tehničkim oblastima. Razlog za njegovo donošenje je u potrebi reforme sektora stvarnih prava, koja je neophodna zbog tranzicije vlasništva i uslov je za reguliranje stvarno-pravnih odnosa u okolnostima tržišne ekonomije, te je kao takva odavno trebala biti završena. Predloženim zakonom katastar i zemljišna knjiga povjeravaju se na vođenje jednom organu, vode se u jedinstvenoj bazi podataka i zadržavaju sve dosadašnje osnovne odrednice kad su u pitanju sadržaj i procedure vođenja. Ovakvo rješenje predstavlja dobru osnovu za tranziciju u novu organizacionu shemu. Nacrtom zakona su uređeni i područje katastra vodova, i prvi put u Federaciji BiH, područja kartografsko-topografske djelatnosti, registra prostornih jedinica i adresnog registra, procjene vrijednosti nekretnina, te posebno važno područje infrastrukture prostornih podataka, koje je usklađeno s INSPIRE direktivom Evropske komisije. Uređenje ovih područja predstavlja značajan iskorak u zakonodavnom okviru Federacije BiH. Novim zakonom se privatnom sektoru daje više prostora pri izvođenju poslova izmjere i katastra nekretnina. Ovo je posebno bitno s aspekta smanjenja državne uprave, a u konkretnom slučaju i zbog mogućnosti da se državna uprava u ovoj oblasti više posveti svojoj osnovnoj zadaći - održavanju i razvoju sistema izmjere, katastra nekretnina i zemljišnih knjiga. Donošenjem ovog zakona bit će stvoren moderan i kvalitetan okvir za razvoj zemljišne administracije usklađen sa evropskim standardima.

OPĆINA ŽEPČE ISPUNILA USLOVE ZA DODJELU BFC CERTIFIKATA



Općina Žepče ispunila je sve kriterije za dodjelu BFC sertifikata za povoljno poslovno okruženje (Business Friendly Certification South East Europe - BFC SEE), čime se svrstala u uži krug certificiranih općina s povoljnim poslovnim okruženjem u Jugoistočnoj Europi. Prethodnu pozitivnu ocjenu evaluatora potvrdila je Verifikacijska komisija koja je

ukupnu ispunjenost kriterija ocijenila sa 90,3%. Zvaničnu odluku donijelo je Regionalno vijeće koje je jednoglasno odlučilo da je općina Žepče ispunila sve potrebne uvjete za dodjelu međunarodnog sertifikata za povoljno poslovno okruženje.

Gledajte Savez općina i gradova
Federacije Bosne i Hercegovine na



Tijekom 12 mjeseci procesa pripreme, općina Žepče trebala je da dokaže u kojoj mjeri ispunjava 12 kriterija i više od 80 podkriterija, koji se, između ostalog, odnose na proces strateškog planiranja, uspostavu jedinice za lokalni ekonomski razvoj (RAŽ) i Privrednog savjeta (LEF-a Žepče), unapređenje kvalitete usluga i informacije koje jedinica lokalne samouprave pruža gospodarstvenicima i stranim investitorima.

Zaključak evaluacijske komisije, a koji je potvrđen i od strane članova Verifikacijske komisije je da općina Žepče dobro funkcionira i da su aktivnosti općinske administracije i Razvojne agencije Žepče, kao dijela Općinskog tima koji je vodio cjelokupan pripremni proces certifikacije, usmjereni prema napretku i otvoreni za nova iskustva i poboljšanja preko usvajanja novih saznanja i praksi, kroz nekoliko projekata i procesa u kojima se Općina Žepče izgrađivala i prilagođavala novim izazovima poslovnog sektora i otvarala se za što bolju suradnju i zajednički rad s postojećim gospodarstvenicima i potencijalnim investitorima.

Dobijanjem međunarodno priznatog certifikata za povoljno poslovno okruženje (BFC SEE) općina Žepče očekuje kvalitetniju regionalnu suradnju sa poslovnim sektorom i međunarodnim institucijama i bolje prepoznavanje od strane domaćih institucija koje su zadužene za regionalni ekonomski razvoj BiH, u njihovim razvojnim planovima i na aktivnijoj promociji investicijskih potencijala općine Žepče na regionalnoj i međunarodnoj razini.

BFC SEE program provodi Regionalni savjet za povoljno poslovno okruženje i partnerske organizacije iz četiri države - Ministarstvo za ekonomske odnose i regionalnu saradnju Republike Srpske, Privredna komora RS-a, Federalno ministarstvo razvoja, poduzetništva i obrta BiH, Regionalna razvojna agencija Hercegovine (REDAH), Centar za lokalni ekonomski razvoj (Hrvatska), Zajednica jedinica lokalnih samouprava Makedonije (ZELS), Savez makedonskih privrednih komora (MCC) i NALED (Srbija).

Izvor: Akta.ba



Grb Općine Žepče

INTERVJU SA NAČELNIKOM BUŽIMA AGANOM BUNIĆEM

Sa načelnikom općine Bužim, gospodinom Aganom Bunićem, glavni i odgovorni urednik EUROMANAGERA razgovarao je o projektima i planovima Općine, o privredi na području Bužima, kao i drugim temama koje se tiču stanovništva ove Općine.



O sebi....

„Rođen sam u Bužimu, 22. jula 1980. godine, kao četvrto dijete u porodici. Oženjen sam suprugom Ilfetom i otac dvoje djece. Osnovnu školu sam završio u Bužimu, Srednju medicinsku školu u Bihaću, te Pravni fakultet na Univerzitetu u Bihaću. Član sam Predsjedništva Saveza Općina i gradova FBiH ispred općina USK-a, član Sabora IZ u BiH, te niza drugih asocijacija i organizacija od značaja za općinu Bužim i USK-a.“ – počinje svoju priču gospodin Agan Bunić, načelnik općine Bužim. „Po završetku studija obavljao sam pripravnički staž u općini Bužim, gdje sam kasnije zaposlen kao državni službenik u Službi za razvoj i poduzetništvo. Poziciju predsjedavajućeg Općinskog vijeća obnašao sam od 2008. do 2011. godine, a od aprila 2012. godine sam radio kao zaposlenik Federalnog zavoda za PIO Kantonalne administrativne službe Bihać, na poslovima šefa Odjeljenja za pravne, kadrovske i opće poslove. Poziciju Općinskog načelnika općine Bužim preuzeo sam krajem 2012. godine.“

O općini Bužim, u brojkama...

„Općina Bužim je najmlađa krajiška općina, ali ni u kom smislu mala i nerazvijena. Prostire se na 129 km², a po posljednjem popisu, prema neslužbenim podacima, broji preko 20.000 stanovnika, što je svrstava u red srednjih općina u državi po broju stanovnika. Trenutno je na području općine Bužim zaposleno oko 1.300 radnika, dok je na evidenciji nezaposlenih evidentirano blizu 4.000 osoba. Studenata, koji studiraju širom BiH, te u zapadnoevropskim i državama regiona, ima oko 300, dok je 750 srednjoškolaca koji pohađaju srednju školu u Bužimu, i oko 2.200 osnovaca u tri osnovne škole. Bilježimo konstantan razvoj u proteklih 20 godina po svim sektorima. Posebno je primjetan razvoj infrastrukture, poljoprivredne proizvodnje, uslužnih djelatnosti i razvoj privatnog sektora.“



Grb Općine Bužim

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfocentar.ba
www.balkanfund.org
www.eurelsmmed.com
www.eacea.ec.europa.eu

“Bilježimo konstantan razvoj u proteklih 20 godina po svim sektorima.

Posebno je primjetan razvoj infrastrukture, poljoprivredne proizvodnje, uslužnih djelatnosti i razvoj privatnog sektora“, rekao je Agan Bunić.

O projektima...

„Ove godine završavamo ili smo započeli niz veoma značajnih projekata. Kapitalni projekat koji smo počeli ove godine, a na koji građani Općine čekaju petnaestak godina, jeste izgradnja sportske dvorane. Investicija je vrijedna 1,7 miliona KM i već smo potpisali ugovor o izgradnji prve faze vrijednosti 700 hiljada KM, koju izvodi kompanija “Širbegović” iz Gračanice. Ukoliko bude sve teklo planiranom dinamikom, sportska dvorana će do kraja naredne godine biti u funkciji.

Također, jedan od najznačajnijih projekata jeste izgradnja vodovoda “Pivnice” u Mjesnoj zajednici Konjodor. Projekat je vrijedan više od milion KM, za čiju realizaciju su sredstva operativna. Mjesna zajednica Konjodor je na području USK i šire, prepoznatljiva po proizvodnji malina, što potvrđuje 500 dunuma pod zasadam ove kulture, a kvalitetno obezbjeđenje vodom ovog područja u znatnoj mjeri će povećati navedenu proizvodnju. Ništa manje važna investicija, čiji početak realizacije očekujemo ove godine, jeste izgradnja 110 kV stanice za područje općine Bužim, čiji je investitor Elektroprijenos. Investicija je aktuelna više od deset godina, a ove godine je potpisan ugovor vrijedan 2,1 milion KM, dok će ukupna investicija iznositi preko tri miliona KM. To je, ujedno i najveća investicija na području općine Bužim, u oblasti snabdijevanja električnom energijom, koja će značiti još jači privredni razvoj, te sigurnu, redovnu i kvalitetnu isporuku električne energije privrednim subjektima i domaćinstvima.“

„Kada je u pitanju općinska infrastruktura, u puteve, škole, igrališta, javnu rasvjetu i druge sadržaje ulažemo oko jedan milion KM godišnje. Bitno je naglasiti i početak implementacije projekta IFAD, kroz koji će, u naredne tri godine biti uložen jedan milion KM u razvoj poljoprivrede i infrastrukture koja služi ovoj grani privrede. Nedavno smo održali sastanak sa predstavnicima Ambasade Švicarske u BiH, koja će zajedno sa UNDP-em implementirati projekat u oblasti vodosnabdijevanja i zaštite okoliša. Dakle imamo pozitivne efekte i pozitivna kretanja i smatram da je ovo najbolja godina za investicije u dosadašnjih dvadeset godina postojanja općine Bužim. To s ponosom i ističemo.“

O infrastrukturi...

„Od značajnijih infrastrukturnih projekata koji su urađeni možemo izdvojiti izgradnju dijela bužimske zaobilaznice i povezivanje svih mjesnih zajednica sa centrom Općine, izgradnju srednje škole i nekoliko područnih škola, gradski vodovodni sistem je urađen za 70% prostora Općine, i niz drugih kapitalnih projekata (novi objekat Doma kulture, nova zgrada pošte, rekonstrukcija Doma zdravlja, i sl.). Projekti koji će u narednom periodu imati poseban status u radu lokalne zajednice su završetak izgradnje sportske dvorane i zaobilaznice, te početak izgradnje kanalizacione mreže u centru Općine. Pored navedenih projekata posvetićemo pažnju izgradnji gradskog trga i šetnice, te novoj zgradi općinske uprave.“

O efikasnosti....

„U općinskoj administraciji trenutno radi 45 zaposlenika, i možemo reći da nemamo problem s viškom zaposlenih u administraciji, naprotiv nedostaje nam nešto stručnih kadrova visoke stručne spreme. Smatramo da administracija uvijek može i treba biti efikasnija, ali kad administraciju općine Bužim, po stepenu riješenosti predmeta, uporedimo sa drugim općinama u USK-a, onda ističemo da se radi o jednoj od najuspješnijih administracija. Po izvještajima smo uvijek u prva tri mjesta. Privrednici su na prvom mjestu, ne onako deklarativno i da bi se nekom dodvoravali, već oni suštinski zaslužuju prvo mjesto. Njihovi zahtjevi, ukoliko su kompletni i utemeljeni na zakonu i nadležnostima Općine, se rješavaju u najkraćem mogućem roku. Posebno kada su u pitanju odobrenja za rad iz nadležnosti Općine, možemo reći da se ona izdaju u svega nekoliko dana. Dobijanje dozvole za građenje je nešto složenije zbog zakonskih procedura koje općine samo provode, ali i za taj sektor možemo reći da smo efikasni i zauzimamo zlatnu sredinu u poštivanju rokova.“

O privredi...

„Na području Općine trenutno je registrirano oko 200 privrednih subjekata, od kojih se posebno ističu firme za preradu drveta ‘Arkada’, ‘Asim-komerc’, stolarija ‘Ičanović’, najpoznatije bužimske građevinske kompanije ‘Kov-Grad’ i ‘Final-gradnja’, rudnik mangana ‘Bužim’, pogoni ‘Saniteksa’ u Bužimu, otkuplivač poljoprivrednih proizvoda ‘Vrganj-promet’ i niz drugih trgovačkih i uslužnih kompanija.“

O investicijama...

„Imali smo u proteklom periodu i domaćih i stranih investicija. Jedna od najvećih je bila privatizacija fabrike stolica od strane italijanskog vlasnika. Rudnik mangana je također privatiziran od strane bugarske firme, koji trenutno radi i zapošljava oko 50 radnika. Zadnji pozitivni primjeri ulaganja na područje Bužima su izgradnja trgovačkog centra ‘Bingo’, koji je zaposlio oko 50 radnika, te kupovina dionica ‘Saniteksa’ od strane ‘Preventa’ Sarajevo, čime su se stvorili preduslovi za proširivanje proizvodnih kapaciteta u pogonima ‘Saniteksa’ u Bužimu.“

Izvor: Euromanager



OPĆINA VISOKO U PROJEKTU OSPOSOBLJAVANJA I ZAPOSŁJAVANJA ŠIVAČA



Na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 32. sjednici održanoj dana 29.10.2015. godine, donjela je zaključak da se Regionalnoj ekonomskoj zajednici REZ d.o.o. Zenica sredstva u iznosu od 45.300,00 KM za sufinansiranje projekta "Stručno osposobljavanje i zapošljavanje šivača za potrebe kompanije Alma Ras d.o.o. Visoko".

U skladu sa Sporazumom o partnerstvu potpisanim između: Vlade Zeničko-dobojskog kantona, Općine Visoko, Federalnog zavoda za zapošljavanje, Alma Ras d.o.o. Visoko i REZ d.o.o. Zenica, kao pomoć za stručno osposobljavanje i zapošljavanje 151 osobe koje su se vodile kao nezaposlene osobe na evidenciji Službe za zapošljavanje, omogućit će se njihova edukacija i zaposlenje.

Putem educiranja i zapošljavanja nezaposlenih lica kroz formalno i neformalno obrazovanje, a prema iskazanim potrebama kompanije "Alma Ras d.o.o. Visoko", te u sklopu svojih razvojnih planova i povećanja proizvodnih kapaciteta potpisan je ovaj Sporazum o partnerstvu, kao okvir za sistematičnu saradnju između više zainteresiranih strana, među kojima i Općina Visoko.

Iznos kojim Općina Visoko podržava ovaj projekat je 15.000,00 KM, a sa ovakvim investicijama vraća se imidž Visokom koji je godinama uživalo.



Grb Općine Visoko

KANTON SARAJEVO PREDSTAVIO PODRŠKU ZA POSLOVANJE

U okviru projekta "Podrška razvoju brzorastućih malih i srednjih preduzeća i lokalnog poslovnog okruženja FGSMes" koji finansira EU, 6. januara je u prostorijama SERDA-e održan prvi sastanak tima za "Koordinaciju inicijativa ekonomskog razvoja, razvoja malih i srednjih preduzeća i zapošljavanja".

Ovo neformalno tijelo za koordinaciju saradnje pokrenuto je na inicijativu Savjetodavnog tijela projekta FGSMes, koje je pored partnera u projektu, sastavljeno od predstavnika Ministarstva privrede Kantona Sarajevo i Privredne komore FBiH.

Prvi sastanak tima za koordinaciju je organizovan sa ciljem predstavljanja podrške Kantona Sarajevo, koja je na raspolaganju za poslovanje i lokalne zajednice, kao i sa ciljem predstavljanja akcionih planova, mjera i inicijativa lokalnih zajednica ka višim nivoima vlasti u Bosni i Hercegovini. Osim toga, koordinacija ima za cilj jačanje međusobne saradnje i razmjene informacija relevantnih institucija i organizacija, kada je u pitanju ekonomski razvoj, mala i srednja preduzeća i zapošljavanje, te pisanje projekata za EU fondove.

Partneri u projektu općine Vogošća, Novi Grad Sarajevo i Ilijaš su u okviru projekta razvili akcione planove s ciljem poboljšanja poslovnog okruženja i saradnje sa poslovnim sektorom u 2016. godini. Ti akcioni planovi su promovisani i predstavljeni na istom sastanku.

Sastanku su prisustvovali predstavnici Ministarstva privrede Kantona Sarajevo, Privredne komore FBiH, predstavnici odjela LER-a općina Ilijaš, Novi Grad Sarajevo, Stari Grad Sarajevo, LESPnet-a i SERDA-e kao facilitatora procesa.



Partneri u projektu općine Vogošća, Novi Grad Sarajevo i Ilijaš su u okviru projekta razvili akcione planove s ciljem poboljšanja poslovnog okruženja i saradnje sa poslovnim sektorom u 2016. godini.

OPĆINA HADŽIĆI KUPILA ZEMLJIŠTE BIVŠE PDI „BJELAŠNICA“



Općinski načelnik Hamdo Ejubović i direktor preduzeća Herpal d.o.o. Sarajevo Ljiljanko Palac su 28. decembra/ prosinca u zgradi Općine Hadžići potpisali ugovor o kupoprodaji 96 dunuma zemljišta bivšeg Preduzeća drvne industrije "Bjelašnica" Hadžići vrijedan 5,3 miliona KM. Općina Hadžići je navedeni iznos uplatila preduzeću "Herpal" 30. decembra/ prosinca 2015. godine čime su i zvanično postali vlasnici ove industrijske zone.

Mogu poručiti svim zainteresovanim ulagačima da su naši uslovi izuzetno

povoljni ukoliko neko želi da pokrene industriju i zaposli što veći broj ljudi sa biroa. U narednom periodu ćemo zemljište urediti, a zatim upoznati sve zainteresovane investitore, kako domaće tako i strane, da jedan ovakav prostor postoji nadomak Sarajeva", kazao je Ejubović.

KORISNI LINKOVI ZA PREDPRISTUPNE FONDVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

GODINA USPJEŠNIH PROJEKATA SARAJEVSKE OPĆINE NOVI GRAD

Općina Novi Grad realizovala je veliki broj projekata u 2015. godini, međutim pet projekata je promijenilo lice i popravilo kvalitet života u Novom Gradu. Otvaranje Centra Safet Zajko jedan je od važnijih projekata koji je obilježio 2015. godinu. "Projekat ima višestruki značaj, 11 hektara zemljišta je stavljeno u funkciju parka, što nije u potpunosti završen projekat i koji će se raditi i narednih godina", kazao je 30. decembra/ prosinca na novogodišnjoj press konferenciji načelnik sarajevske Općine Novi Grad Semir Efendić. Najavio je kako će Općina nastaviti i dalje raditi na uređenju



Press konferencija

ovoga prostora. Drugi jako bitan projekat je dovršetak Lota 2 Sarajevske zaobilaznice, koji je spojio Sarajevo sa autoputem. Općina Novi Grad je postala i prva općina u BiH sa biciklističkom stazom. "Na projektu ćemo raditi i dalje. U planu je produženje biciklističke staze prema Dobrinji", kazao je Efendić, naglašavajući kako je jako značajan projekat za Općinu Novi Grad i dovršetak primarne vodovodne mreže u Dobroševićima. Dobar dio posla je urađen, međutim kako kaže Efendić još će biti posla na ovom području. Vrlo važan projekat koji je Općina počela i na kojem će se raditi i naredne godine je izgradnja Spomen-doma oslobođiocima Općine Novi Grad i grada Sarajeva. Načelnik kaže kako je izgradnja počela, otkupljeno je 80 dunuma zemljišta od strane Općine. Planirano je da na ovom prostoru građani Sarajeva i turisti dolaze tokom cijele godine. Uz ovih pet projekata načelnik kaže kako je važno naglasiti da je Općina imala imala veće prihode po izvršenju za oko sedam miliona maraka u odnosu na raniju godinu. U Novu godinu Općina ulazi sa novim projektima i nastavlja započete. U februaru će se na Vijeću naći urbanistički projekat izgradnje Kongresnog centra. Javna rasprava je u toku, a arhitektonski studio koji je pobijedio na međunarodnom natječaju radi idejni projekat za koji će biti izdvojeno oko 200.000 KM.

U 2016. godini u planu je i izgradnja IX transversale zašto je dovršen proces ekspoprijacije zemljišta kroz Energoinvest - Tvornicu dalekovodnih stubova. Odvojena su sredstva i izgradnju Sportsko-rekreativnog centra Dobrinja. Općina Novi Grad zajedno sa Ministarstvom prostornog uređenja, građenja i zaštite okoliša KS kreće u realizaciju pilot projekta utopljanja zgrada na Alipašinom Polju. Jedan od zanimljivih projekata Općine u narednoj godini je i redizajn i rekonstrukcija trga na C fazi na Alipašinom Polju. Načelnik je potvrdio nedavnu informaciju o izgradnju hotela Hedef Group. Načelnik je kazao kako će se hotel nalaziti u blizini zgrade općine, glavne saobraćajnice i neće nikome smetati, a kapacitet ovoga hotela je oko 500 soba.



Grb Općine Novi Grad Sarajevo



Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: dino@sogfbih.ba

Pratite nas na:

Gledajte Savez općina i gradova Federacije Bosne i Hercegovine na



Pratite Savez općina i gradova FBiH na



VIZIJA MOSTARA KAO ETROPOLISA I ETNOPOLISA UZ PODRŠKU GRAĐANA



„Entropolis i etnopolis - Mostar – globaliziran, reindustrijaliziran, energetski učinkovit i turistički i okolišni atraktivan grad“, vizija je razvoja Grada Mostara za razdoblje 2016-2025. godine koju nadležni najvećeg grada na Neretvi žele utkati u „Strategiju Grada Mostara“. Tako se odnedavno užurbano provode aktivnosti na izradi ovog najvažnijeg strateškog dokumenta, koji, pak, Grad Mostar nema i to uz podršku UNDP-ija, te su pozvani građani da daju svoje prijedloge i tako se aktivno uključe u izradu Strategije

Glavna savjetnica gradonačelnika Mostara Radmila Komadina, koordinatorica radne skupine za izradu Strategije, izjavila je za

Dnevni avaz kako prije svega građanima treba približiti pojmove „entropolis“ i „etnopolis“.

„Mostar kao „etnopolis“ je mjesto susreta kultura, a „entropolis“ kao mjesto susreta poduzetnika, investitora i inovatora, ali i svega onog što bi moglo utjecati na to da Grad zaživi ekonomski, gospodarski i da se, jasno, počnu otvarati radna mjesta“, kazala nam je Komadina.

Iako ovaj strateški dokument još uvijek nije finaliziran, Komadina otkrila kako postoji mogućnost da vrlo brzo dva projekta koja će biti u okviru Strategije, a koja se odnose na ekonomski, društveni sektor te zaštitu okoliša budu finansirana iz fondova Evropske unije.

„Stoga smo smatrali kako je jako poželjno uključiti javnost, pa smo poziv građanima objavili na našoj web stranici www.mostar.ba kako bi predložili svoje projektne ideje, kako bi nakon 10. januara 2016, do kada traje poziv, sagledali koliko su izgledi za njihovo finansiranje s obzirom na obim i značaj“, kazala nam je Komadina.

Izrazila je zadovoljstvo činjenicom da je na ovaj način Gradska uprava pobudila pozornost javnosti i što već pristižu prijedlozi projekata. Uz Komadinu, kao koordinatoricu, i gradonačelnika, skupinu čine svi načelnici gradskih odjela, predstavnici Zavoda za prostorno uređenje, Centra za socijalni rad i nevladinog sektora.

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu proslijedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.



Grb Grada Mostara